

四庫全書

子部

欽定四庫全書

子部

格致鏡原卷

四十六至
五

詳校官中書

臣羅錦森

侍讀臣孫球覆勘

總校官中書臣朱鈐

校對官原任典簿臣郭祚熾

謄錄監生臣李璜

欽定四庫全書

格致鏡原卷四十八

大學士陳元龍撰

耕織器物類

耒耜

易繫辭庖羲氏沒神農氏作剡木為耜揉木為耒耒耜
之利以教天下蓋取諸益 白虎通人食禽獸肉神農
時人多禽獸不足神農乃因天時地利制耒耜教人農
作 釋名耜齒也似齒之斷物也 說文耜耒端木也

耒手耕曲木也垂作耒耜以振民 增韻柄曲木曰耒

耒專刃曰耜 考工記車人為耒庇音刺長尺有一寸中

直者三尺有三寸上句者二尺有二寸自其庇緣其外
以至於首以弦其內六尺有六寸與步相中也堅地欲
直庇柔地欲句庇直庇則利推句庇則利發倨句磬折
謂之中地注庇耒下前曲接耜者 韻學庇耒面 考

工記注古者耜一金兩人併發之今耜岐頭兩金象古
之耦 管子小匡注穀及小於耜一人執之以隨耒耜

之後重治其闕遺

犁附鏡

總論 逸雅犁利也利則發土絕草根也 孔六帖室
韋刺木為犁人挽以耕 稗史類編山海經曰稷降百
穀種之稷之弟曰台璽生叔均叔均是始作耕注云用牛
穀始作耕又曰后稷之孫曰叔均是始作耕注云用牛
犁也是則耕之用牛自叔均始矣 齊民要術趙過始
為牛犁實勝耒耜之利 崔寔正論漢武帝使趙過為

搜粟都尉教民以牛植其法三犁共一牛以一人將之下種挽樓皆取備焉

名類 魏略皇甫隆為燉煌太守民不曉耕隆乃教民作樓犁省力過半 齊民要術耨車狀如三足犁中置耨斗藏種以牛駕之一人執耨且行且搖種乃隨下

宋史淳化五年武允成獻踏犁一具不用牛以人力運即趙過教以庸輓犁遺法也陳堯叟齋踏犁往宋州景德二年內出式凡四五人力可比牛自尚方造樣 陸

龜蒙耒耜經耒耜農書之言也民之習通謂之犁冶金而為之者曰犁鏡曰犁壁斲木而為之者曰犁底曰壓鏡曰策頷曰犁箭曰犁轆曰犁梢曰犁評去聲曰犁建曰犁槃木與金凡十有一事耕之土曰塏猶塊也起其塏者鏡也覆其塏者壁也故鏡引而居下壁偃而居上鏡之次曰策頷言可以扞其壁也皆賾然相戴自策頷達於犁底縱而貫之曰箭前如程而樛者曰轆後如柄而喬者曰梢轆有越加箭可弛張焉轆之上又有如槽形亦

加箭焉刻為級前高而後庫所以進退曰評進之則箭
下入土也深退之則箭上入土也淺以其上下類激射
故曰箭以下淺深數可否故曰評評之上曲而衡之者
曰建建捷也所以扼其轅與評無是則二物躍而出箭
不能止橫於轅之前末曰槃言可轉也左右繫以楹乎
輓轅之後末曰梢中在手所以執耕者也轅取車之冒
梢取舟之尾

長鑿 庶物異名疏鋤長鑿也鑿犁土具 杜甫同谷

歌長鑿長鑿白木柄 三才圖會比犁鑿頗狹制為長柄謂之長鑿柄偃而曲上有橫木如拐以兩手按之用足踏其鑿柄後跟其鋒入土乃拔柄以起壠也古謂之蹠鏵今謂之踏犁

耙附耖耨

總論 物原叔均作耖耙 逸雅耙播也所以播除物也 種時直說犁一耙六今人只知犁深為功不知耙細為全功耙功不到則土粗不實後雖見苗立根根不

相著土不耐旱有懸死蟲咬乾死等病蓋耙偏數惟多為熟

名類

釋名齊魯謂四齒耙曰櫟

郭璞方言注無齒

為杓 急就章注無齒為杓有齒為耙皆所以推引聚禾穀也 齊民要術耙謂之鐵齒鋤鑄 方言耙宋魏

間謂之渠挈或謂之渠疏

三才圖會耙之制直柄橫

首柄長四尺首闊一尺五寸列鑿方竅以齒為節夫畦畛之間鍤剔塊壤疏去瓦礫場圃之上耨聚麥禾擁積

稽穗皆賴耜之用也復有穀耜或謂透齒耜用攤曬穀
 又耜以木為柄以鐵為齒用耜稻禾又竹耜場圃樵
 野間用之 農政全書耜制有方耜有人字耜如犁亦
 用牛駕但橫闊多齒犁後用之蓋犁以起土惟深為功
 耜以破塊惟細為功耜之後又用耒耨耒耨如耜其齒
 更長所以耒土益細耨摩田器 耒耨經耜而後有耨
 耨馬有礮礮馬自耨至礮礮皆有齒礮礮而後以木
 為之堅而重者良

耖 農桑通訣耖疏通田泥器也上有橫柄下有齒以
兩手按之前用畜力輓行一耖用一人牛有作連耖二
人二牛特用於大田見功尤速耕耖而後用此泥壤始
熟

耨 三才圖會勞

去聲
同耨

無齒耨 齊民要術春耕尋手

勞秋耕待白背勞注春多風不即勞則致地虛燥秋田
壠濕速勞則恐致地硬 農桑通訣今人呼勞曰蓋磨

鋤

事物紀原周書曰神農時天雨粟帝種之作鉏耨以墾
草莽然後五穀興則鋤蓋神農造也詩曰痔乃錢耨注
鋤也世本曰倅作耨釋名曰鋤類然則耨耨即鋤矣
逸雅鋤助也去穢助苗長也齊人謂其柄曰檀檀然正
直也頭曰鶴似鶴頭也 六書故鋤墾土器有柄 纂
文耨如鍤柄三尺刃廣二寸以刺地除草 呂氏春秋
耨柄尺此其度也其耨六寸所以間稼也 字詁耨頭
長六寸柄長六尺以芸田也 考工記越無耨夫人而

能為鎛也注越地塗泥多草穢而山出金錫鑄冶之業
田器尤多也 詩周頌其鎛斯趙注鎛柄長尺其耨六
寸入苗間能去草 爾雅疏斫斲一名定郭云鋤屬李
巡曰鋤別名也廣雅云定謂之耨世本云垂作耨 方
言闕東謂大鋤曰鹵斲 釋名鎡基大鋤也 庶物異
名疏周禮茲其孟子雖有鎡基賈逵云鎡基耜也呂覽
耜六寸所以間稼說文鎡謂鎡基急就注鉏去草之具
一名鎡基 爾雅疏斫一名鑄郭云鑄也說文云鑄大

鋤也 事物紺珠鐫鑿廣刃鋤

鐵搭

農桑通訣鐵搭或四齒或六齒似杷非杷斫土如搭是名鐵搭就帶圓銎以受直柄柄長四尺農家或乏牛犁舉此斫地以代耕墾取其疏利仍就鑄鑄塊壤兼有杷鑿之効 正字通鐵搭發土具頭廣一尺功用勝於耜使為廣尺之畝一人可勝若兩人併發則廣二尺

鍤 附鏵 欬

逸雅鍤插也插地起土也或曰銷銷削也能有所穿削也或曰鏵鏵剗也剗地為坎也其板曰葉象木葉也

爾雅疏方言云燕之東北朝鮮冽水之間謂之廁宋魏之間謂之鏵或謂之鐸江淮南楚之間謂之畝趙魏之間謂之鼎是皆謂今鍤也事物紺珠鍤兩頭鐵銳刺草束擔之淮南子禹之時天下大水禹執畚畝以為民先

鏵 集韻鏵耕具也 釋名鏵鍤類起土也 說文鏵

兩刃鍤也 淮南子伊尹之興土功修脚者使之蹠鍤
三才圖會鍤與鑿頗異鑿狹而厚惟可正用鍤闊而
薄翻覆可使老農云開墾生地宜用鑿翻轉熟地宜用
鍤 開天傳信記李齊物天寶初為陝州刺史開砥柱
之險堅石中得古鐵犁鍤有平陸字因改河北縣為平
陸縣

杓 玉篇杓鑿屬 正韻杓鍤屬 事物原始杓或以
鐵或以木為之用以取沙土方言鐵者名跳杓木者名

杵部 三才圖會煅鐵為首謂之鐵杵惟宜土工剡木為首謂之木杵可揅穀物又有鐵刃木杵裁割田間墜埂又以竹為之者淮人謂之竹揚杵與江浙颺籃少異

鍤附鍤 鍤

逸雅鍤廡也體廡薄也其所刈稍稍取之又似廡者也事物原始說苑曰孔門吾丘子振鍤帶而哭然則三代之田器也用以穫稻麥周禮薙氏掌殺草夏至而夷之鄭注鈎鍤迫地芟之也風俗通鍤刀自揆積

芻蕘之效 農桑通訣鑣制不一有佩鑣有兩刃鑣有
袴鑣有鈎鑣有推鑣 方言刈鈎自闕而東謂之鑣或
謂之鋏音結 說文銍獲禾短鑣也 集韻鉞長鑣也

鋏 三才圖會鋏似刀而上彎如鑣而下直其背指厚
刃長尺許柄盈二握又謂之彎刀以刈草禾或斫柴篠
農家便之

鏟 集韻鏟兩刃刈刀也 太公農器篇春鏟草棘

水車 附戽斗

莊子子貢過漢陰見一丈人為圃畦鑿隧而入井抱甕而出灌用力甚多而見功寡子貢曰有械於此一日浸百畦鑿木為機後重前輕挈水若抽數若沃湯其名桔

槔 通俗文桔槔機汲水也 說文桔結也所以固屬

槔臯也所以利轉 魏略馬鈞巧宦絕世居京都有地

可以為園而無水以灌乃作翻車令兒童轉之而灌水

自覆更出更入巧百倍於常 演繁露水車古無見莊

子所云桔槔之制意是就有水處立木其上交午如十

字一頭繫甕一頭虛垂人為制其低昂故其挈水若抽
數如沃湯也沃湯者湯之沸騰而湧起者也此其為械
比之抱甕則事半而功加倍矣然而自此時至漢皆未
有今世捲水之車也魏略所云馬鈞之翻車此方是今
之水車也 稗史類編今田家有水車天旱時引水以
溉田其制起自魏馬鈞而漢靈帝使畢嵐作翻車設機
束以引水灑南北郊路又自畢嵐所制矣 王鳳蔭名
物通江浙間目水車為龍骨車 留青日札今水車中

蝦蟆練頭名曰龍骨蓋龍能行水亦取其形似脊骨也
王安石詩倒持龍骨挂屋敖又云龍骨長乾挂梁招又
云脩脩兩龍骨豈得長挂壁蓋龍骨節故可挂今遂
以為水車非也 三才圖會翻車之制除壓欄木及列
檻樁外車身用投作槽長可二丈闊則不等或四寸至
七寸高約一尺槽中架行道板一條隨槽闊狹比槽板
兩頭俱短一尺用置大小輪軸同行道板上下通過以
龍骨板葉其在上大軸兩端各帶枋木四莖置於岸上

木架之間人憑架上踏動枋木則龍骨板隨轉循環行道板刮水上岸又水轉翻車其制與人踏翻車大同小異視水勢隨宜用之日夜不止絕勝踏車又有牛轉翻車比人踏功倍 稗史類編嚴州山中灌禾之法有水輪其制約水面至岸高若干尺如其度為輪輪之輻以軸大幹為之每軸出栢處繫一竹筒但微繫其腰使兩頭活動可以俯仰置軸半岸貫輪其上岸上近輪處置木槽以承水溪水散緩則以石約歸輪下使水急水急

則輪轉如飛每筒得水則底重口仰及轉至上則筒口
向下水瀉木槽分流田中不勞人力而水自足蓋利器
也夫桔槔隨處有之或運以手或運以足或運以牛機
器之巧無踰此矣山中深溪高岸桔槔之巧莫能施矣
於是乎有水輪之制焉

戽斗 物原公劉作戽斗 事物原始戽以木為小桶
桶旁繫以繩兩人用以取水名曰戽桶

戽

逸雅耒加也加杖於柄頭以撾穗而出其穀也或曰羅耒三杖而用之也或曰了了杖轉於頭故以名之也

詞林海錯周公謹曰今農家打稻之連耒古之所謂拂也王莽傳東巡載耒南巡載耨西載銍北載拂注音佛以擊治禾狄武襄以錦連耒破儂智高非特治禾也

方言僉所以打穀者宋魏間謂之攝及或謂之度自關而西謂之梔或謂之拂齊楚江淮間謂之秧或謂之梔郭璞注僉今連耒餘冬序錄打稻具吳人謂之連耒

楚人謂之掉花 農桑通訣連耒之制用木條四莖以生革編之長可三尺闊可四寸又有以獨挺為之者皆於長木柄頭造為環軸舉而轉之以撲禾也

义

三才圖會义箱禾具也揉木為之通長五尺上作二股長可二尺上一股微短皆形如彎角以箱取禾縛也又有以木為輪以鐵為首二其股者利如戈戟唯用义取禾束謂之鐵禾义 農田餘話後至元丙子丞相伯顏

當國禁江南農家用鐵禾叉即叉犯者杖一百七十以
防南人造反之意民間止用木叉挑取禾稻 說文耒
叉可以剗麥河內用之

擔

釋名擔任也力所勝任也 集韻櫛尖頭擔也 農桑
通訣擔者負禾具其長五尺五寸剗匾木為之者謂之
輓擔斫圓木為之者謂之櫛擔匾者宜荷器與物圓者
宜荷薪與禾田家收穫之後塋埂之上禾積星散欲登

場圃荷此為便

篋

集韻篋盛穀器 三才圖會篋或作因北方以荆柳或蒿卉制成圓樣南方判竹編草或用蘆篠空洞作圓以貯穀南北通呼曰篋 說文篋判竹圓以盛穀 淮南子守其篋篋 急就章注篋篋皆盛米穀器以竹篋席為之若泥塗之則為篋篋之言屯也物所屯聚也織草為之則曰篋

諸農器

齊民要術凡春種欲深宜曳重耨夏種欲淺直置自生
注春氣冷生遲不曳耨則根虛雖生輒死夏氣熱而生
速曳耨遇雨必致堅垆其春澤多者或亦不須耨必欲
耨者須待白背濕耨則令地堅硬故也 農桑通訣耨
打田簣也用科木縛如埽簣復加匾闊上以土物壓之
古農法云耨種既過後用此耨使壟滿土實苗易生也
又用曳打場面極為平實 三才圖會鋒田器其金比

犁鑿小而加銳其柄如耒首如刃鋒故名鋒取其銛利也地若堅垆鋒而後耕牛乃省力古農法云鋒地宜深鋒苗宜淺齊民要術速鋒之地恒潤澤而不硬注刈穀之後即鋒耨下令突起則潤澤易耕齊民要術苗生壟平鋒而不耨

公頃切

農書無鉞而耕曰耨三才

圖會耨與鋒相類今耨多用岐頭說文耨摩田器也

晉灼曰耨椎塊椎也事始耨以木為之木下用釘

磨田以去草也庶物異名疏耨田器布種後以此器

摩之使土開發處復合以覆種今北地下種後以柳編
薄人立其上而牛引之使平其土以覆種是耩之類歟

三才圖會田盪

他浪切

均泥田器也用了木作柄長六

尺前貫橫木五尺許田方耕耙尚未勻熟須用此器平
着其上盪之使水土相和凹凸各平則易為秧蒔 三
才圖會平板平摩種秧泥田器也用滑田面板長廣相
稱上置兩耳繫索連輓駕牛或人拖之摩田須平方可
受種田家或有仰坐橈代之者輓軸輓碾草禾之器也

其軸木徑可三四寸長約四五尺兩端俱作轉箕挽索用牛曳之江淮之間凡漫種稻田其草禾齊生並出則用此輓碾使草禾俱入泥內再宿之後禾乃復出草則不起後漢書杜詩為南陽太守造作水排鑄為農器用力少而見功多百姓便之注冶鑄者為排吹炭今激水以鼓之也東坡秧馬歌序昔遊武昌見農夫皆騎秧馬以榆棘為腹欲其滑以楸梧為首欲其輕腹如小舟昂其首尾背如覆瓦以便兩髀雀躍於泥中繫束裳

其首以縛秧日行千畦較之偃僂而作者勞佚相絕矣
事物原始篠說文云耘田器也以竹為之苗盛之時
繫於頸以壓苗尖恐害眼也今吳人呼為苗叉 農器
圖譜今湖湘間收禾並用笕架懸之以竹木構如屋狀
若麥若稻等稼獲而繫音之悉倒其穗控於其上久雨
之際比於積塚不致鬱浥又喬杆亦挂禾具凡稻皆下
地沮濕或遇雨潦不無滄浸收穫之際雖有禾耨不能
卧置乃取細竹長短相等量水淺深每以三莖為數近

上用篾縛之義於田中上控禾把又有用長竹橫作連脊以挂禾者凡禾多則用筯架禾少則用喬杆又曬槃曝穀竹器廣可五尺許邊緣微起深可二寸其中平闊似圓而長下用溜竹二莖兩端俱出一握許以便扛移趁日攤布穀實曝之又攢稻簞攢抖擻也簞承所遺稻也農家禾有早晚次第收穫即欲隨手得糧故用廣簞展布置木物或石於上各舉稻把攢之子粒隨落積於簞上非惟免汚泥沙抑且不致耗失又可曬穀物或捲

作筵誠為多便南方農種之家率皆制此 左傳樂喜

陳畚揭注畚箕籠

庶物異名疏畚揭

音局

昇土之器也

治蠶具

筐網

簇植

箔繭甕

架

蠶筐

秦觀蠶書種變方尺及乎將繭乃方尺四織荏

葦範以蒼簋竹長七尺廣五尺以為筐懸筐中間九寸

凡槌十懸以居食蠶

三才圖會蠶筐圓而稍長淺而

有緣適可居蟻蠶及分居時用之閣以竹架易於檯飼

蠶簇蠶箔

農桑直說蠶簇用蒿梢叢柴苫席等凡作

簇先作簇心用長椽五莖上撮一處繫定外以蘆箔繳合是為簇心仍周圍勻豎蒿梢布蠶簇訖復用箔圍及苫繳簇頂如圓亭者此團簇也又有馬頭長簇兩頭植柱中架橫梁兩傍以細椽相搭為簇心餘如常法此橫簇皆北方蠶簇法也嘗見南方蠶簇止就屋內蠶槃上布短草簇之人既省力蠶亦無損 蠶書簇箔以杉木解枋長六尺闊三尺以箭竹作馬眼隔插茅疎密得中復以無葉竹篠從橫搭之簇背鋪以蘆箔而竹篾透背

面縛之即蠶可駐足無跌墜之患 黃省曾蠶經簇以
稻草為之殺疏之必潔則不牽絲乃握而束之厚藉以
所殺疏之草殼可以禦地濕可以承墜蠶勿用菜葉善
絆擾而薄繭 農桑通訣蠶箔承蠶具也禮具曲植曲
即箔也北方養蠶者多農家宅院後或園圃間多種荏
葦以為箔材秋後芟取皆能自織方可四尺以二椽棧
之懸於槌上至蠶分檯去蓐時取其卷舒易用

蠶架蠶網

三才圖會蠶架閣蠶筐具也以細枋四莖

豎之高可八九尺上下以竹通作橫桃十層層每閣養蠶槃筐隨其大小蓋筐用小架槃用大架此南方槃筐有架猶北方椽箔之有槌也蠶網擡蠶具也結繩為之如魚網之制其長短廣狹視蠶槃大小制之沃以漆油則光緊難壞貫以網索則維持多便至蠶可替時先布網於上然後灑桑蠶聞葉香皆穿網上食候蠶上葉齊手共提網移置別槃遺除拾去比之手替省力過倍南蠶多用此法北方蠶小時亦宜用之

蠶槌 務本直言穀雨日豎槌立木四莖各過梁柱之高槌隨屋每間豎之其立木外旁刻如鋸齒而深各每莖挂桑皮圓繩四角按二長椽椽上平鋪葦箔稍下絕之凡槌十懸中離九寸以居擡飼之間皆可移之上下農桑直說每槌上中下開鋪三箔上承塵埃下隔濕潤中備分擡 農桑通訣禮季春之月具曲植植即槌也

繭甕 蠶書凡泥繭列埋大甕地上甕中先鋪竹簣次

以大桐葉覆之乃鋪繭一重以十斤為率摻鹽二兩上
又以桐葉平鋪如此重重隔之以至滿甕然後密蓋以
泥封之七日之後出而繰之頻頻換水欲絲明快蓋為
繭多不及繰故即以鹽藏之蛾乃不出 農桑直說生
繭即繰為上如人手不及殺繭慢慢繰者其法有三一
曰日曬二曰鹽浥三曰籠蒸籠蒸最好人多不解日曬
損繭鹽浥甕藏者穩籠蒸者用籠三扇以軟草扎圈加
於釜口以籠兩扇坐於其上籠內勻鋪繭厚三指許頻

於繭上以手試之如手不禁熱可取去底扇却續添一扇在上如此登倒上下故必用籠也

治絲具

釜

繰車

絡車

經架

緯車

紡車

釜 秦觀蠶書繰絲自鼎面引絲直錢眼繰絲必用鼎也今農家象其深大以盤甑 農桑直說釜要大置於竈上

如蒸竈法可繰粗絲單繳者雙繳者亦可

釜上大盤甑接口添水至甑中八分滿可容二人對繰水須常熱宜旋旋下繭繰之多則煮損凡繭多者宜用此釜以趨速效

緣車 事物原始黃帝始命元妃西陵氏養蠶制絲車

以緣絲 秦觀蠶書緣車之制錢眼為版長過鼎面廣

三寸厚九黍中其厚插大錢一出其端橫之鼎耳後鎮

以石又為三蘆管長四寸樞以圓木建兩竹夾鼎耳縛

樞於竹中管之轉以車下直錢眼謂之緣星星應車動

以過添梯

農桑直說云竹筒子宜細鐵條子串筒兩搭子亦須鐵也

添梯車之左端

置環繩其前尺有五寸當牀左足之上建柄長寸有半

匠柄為鼓鼓生其寅以受環繩之應車運如環無端鼓

因以旋鼓上為魚魚半出鼓其出之中建柄半寸上承
添梯者二尺五寸片竹也其上揉竹為鈎以防絲竅左
端以應柄對鼓為耳方其穿以閉添梯故車運以牽環
繩繩簇鼓鼓以舞魚魚振添梯故絲不過偏制車如輶
輶必活兩輻以利脫絲車今呼為輶輶必
以牀以承輶軸農桑直說
輶牀下鼎一尺軸長二尺中經四寸兩頭三寸用榆槐
木四角或六角輻通長三尺五寸六角不如四角輶小
則絲易解

絡車 方言河濟之間絡謂之給郭璞注所以轉簍

農桑通訣以脫軋之絲張于杙上上作懸鉤引致緒端
逗於車上其車之制必以細軸穿簍措于車座兩柱之
間一柱獨高中為通槽以貫其簍軸之首一柱下而管
其簍軸之末人既繩牽軸動則簍隨軸轉絲乃上簍此
北方絡絲車也南人但習掉簍取絲不若絡車安且速
也

經架 三才圖會經架牽絲具也先排絲簍於下上架

橫竹列環以引衆緒總於架前經簿一人往來挽而歸之紉軸然後授之機杼 說文夔收絲具

羅車 方言羅車趙魏之間謂之歷鹿車東齊海岱之間謂之道軌

紡車 六書故說文釋筵曰羅絲筵也筵寧也按寧車紡車也著絲於筵著筵於車踏而轉之所謂紡也 通俗文織織謂之羅受緯曰寧

治綿具

三才圖會撚綿軸制作小碓或木或石上插細軸長可尺許先用叉頭挂綿左手執叉右手引綿上軸懸之撚作綿絲就纏軸上即為袖縷閨婦室女用之可代績紡之工綿矩以木框方可尺餘用張繭綿是名綿矩又有揉竹而彎者南方多用之其綿外圓內空謂之豬肚綿有用大竹筒謂之筒子綿北方大小用瓦然用木矩者最為得法

治麻具

農桑通訣大紡車其制長餘二丈闊約五尺先造地柵
木框四角立柱各高五尺中穿橫桄上架枋木其枋木
兩頭山口卧受捲纜長軋鐵軸次於前地柵上立長木
座座上列臼以承轆底鐵篲轆用木車成甬子長一尺
二枚內轆上俱用杖頭鐵環以拘轆軸又於額枋前排
受績纏置小鐵叉分勒績條轉上長軋仍就左右別架車輪兩
座通絡皮弦下經列轆上撈轉軋旋鼓或人或畜轉動
左邊大輪弦隨輪轉衆機皆動上下相應緩急相宜遂

使績條成緊纏於軋上晝夜紡績百斤又有小紡車則凡麻苧之鄉在在有之蟠車纏繡具也又謂之撥車南人謂撥杼又曰車杼 三才圖會紉車縑繩器也通俗文曰單縑曰紉揉木作捲中貫軸柄長可尺餘以捲之上角用縑麻皮右手執柄轉之左手續麻股既成緊則纏於捲上或隨繩車用之以助紉絞經緊又旋椎掉麻絞具也截木長可六寸頭徑三寸許兩間斫細樣如腰鼓中作小竅插一鈎筭長可四寸用繫麻皮於下以左

手懸之右手撥旋麻既成緊就纏椎上餘麻挽於鉤內
復續之如前所成經緯可作粗布又纏刷疏布縷器也
束草根為之通柄長可尺許圍可尺餘其纏縷杼軸既
畢架以叉木下用重物掣之纏縷已均布者以手執此
就加漿糊順下刷之即增光澤可授機織

治木棉具

攪車
捲筵

弓
紡車

攪車 史炤釋文土人取木棉以鐵鋌碾去其核 三
才圖會攪車用四木作框上立二小柱高約尺五上以

方木管之立柱各通一軸軸端俱作棹柄軸末柱竅不透二人掉軸一人喂上棉花二軸相軋則子落於內綿出於外

弓 釋文以竹為小弓長尺四五寸許牽弦以彈綿令其勻細卷為甬就車紡之 升菴外集今之制棉花弓長五六尺以羊腸為弦彈之聲如晴雷朱以真弓弓弰弰歌 農桑通訣彈弓以竹為之長可四尺許上截頗長而彎下截稍短而勁控以繩弦用彈棉花如彈氈毛

法務使結者開實者虛

捲筵 三才圖會捲筵淮民用蠶忝梢莖取其長而滑
今他處多用無節竹條代之其法先將棉毳條於几上
以此筵捲而扞之遂成綿筒隨手抽筵每筒牽紡易為
勻細

紡車 三才圖會木棉紡車其制比麻苧紡車頗小輪
動弦轉苧維隨之紡人左手握其綿筒牽引漸長無有
斷絕

機

裨史類編淮南子曰伯余之初作衣也絲麻素縷手經指緯後世為之機杼體服以辨此機杼之始也注伯余黃帝臣董巴輿服志黃帝始造機杼傅子舊機五十綜者五十躡六十綜者六十躡有馬生者患其遺曰喪巧乃易以十二躡今紅女織繒惟用二躡又為簡要庶物異名疏牽挺躡機也列子紀昌學射于飛衛飛衛曰爾先學不瞬而後可言射矣昌歸偃卧其妻之機

下以目承牽挺二年之後雖錐末倒皆不瞬也字林云
虔音機下所履即牽挺類也 山堂肆考杼機之持緯
者柚機之受經者 紺珠笈子織器說文笈所以收繩
也 說文筥織具

梭

通俗文梭織具也所以行緯者 唐百官志織染署七

月七日祭杼即梭也 廣博物志梭一名跼蹠 韻府鳳

梭金梭皆玉女梭也 異苑陶侃常捕魚得一織梭還

掛於壁有頃雷雨梭變成赤龍從屋騰躍而去 祕閣
閑話蔡州丁氏女精於女工每七夕禱以酒果忽見流
星墜筵中明日瓜上有金梭自是巧思益進

附漁獵具

網 禽網 魚網

周易庖犧氏之王天下也結繩而為網罟以佃以漁蓋
取諸離 古史考伏羲氏觀蒙面而作網 抱朴子太
昊師蜘蛛而結網 世本庖羲臣勾芒作羅

禽網 史殷紀湯出見野張網四面祝曰自天下四方
皆入吾網湯曰嘻盡之矣乃去其三面祝曰欲左左欲
右右不用命乃入吾網諸侯聞之曰湯德至矣及禽獸
周禮天官獸人掌罟田獸時田則守罟及弊田令禽
注於虞中 禮月令季冬之月田獵罝罾羅網畢翳餽
獸之藥毋出九門註生氣方盛故命司空凡捕鳥獸之
具皆不得出皋庫雉應路城郭郊闕九者之門所以順
生氣也 禮王制鳩化為鷹然後設罝羅注罝捕鳥網

月令注網小柄長謂之畢

爾雅鳥罟謂之羅

謂羅絡之

兔罟謂之罝

罝猶遮也

麋罟謂之罠

罠其頭也

羝罟謂之羝

羝幕也

繫謂之量量罟也罟謂之學學覆車也

今之翻車也有兩轆中施罟以

捕鳥

名物考罟獲以局羅禽獸今之扣網也

張揖廣

雅罔謂之罟罟罟罟罟也

說文翼網也以縲獸足

左思賦罟蹄連罔注罟麋網也蹄兔網也

事物紺

珠遊絲繒又名罕從上掩鳥網罟取鳥小網

魚網

爾雅縵罟謂之九罟九罟魚網也注今之百囊

罟是亦謂之罟今江東謂之纓 詞林海錯郭賦罟罟
比船罟罟皆網名 爾雅罟謂之汕郭璞注罟今之柴
撩罟 三才圖會網制不一隨所宜而用之有塘網有
注網有撒網有張絲網有綽網有攔網有趕網有杈網
有脰網惟注網施於急流中其制纖口而巨腹所得魚
極不貲 庶物異名疏鵠擅網也俗謂之擅堦即今網
內掣魚之具也稍大亦可擅鳥 潘岳西征賦纖經連
白鳴榔厲響貫鯢尾掣三牽兩注纖經連白網也連

白以白羽連綴經上於水中二人對引之所以驚魚入網也 張衡西京賦設置麗注魚罟也 文選解頴鯉於黏微注魚黏於網故曰黏微 南史王固聘魏宴昆明池魏人以南人嗜魚大設罟網固以佛法呪之遂一鱗不獲 文昌雜錄漁家以猢猻毛置之網四角則多得魚云魚見之如人之見錦繡也

罟

初學記罟者樹四木而張網於水車輓之上下 漢書

陳勝傳置人所罾魚腹中師古注罾魚網也形如仰繳
蓋羅而舉之 三才圖會罾亦網也有板罾有坐罾有
提罾三制相似惟坐罾稍大謂之坐者以其定於一處
也

罩

說文罩捕魚器 爾雅篚謂之罩疏李巡曰編細竹以
為罩無竹則以荆謂之楚篚 庶物異名疏楚篚捕魚
籠無底者 三才圖會罩者編竹為巨籠空其兩頭圍

水而漁 淮南子罩者抑之罾者舉之為之有難易得
魚一也

釣竿

詩衛風籊籊竹竿以釣于淇 詩傳絲緡釣綸也 六
韜緡隆餌重則嘉魚食之緡條餌芳則庸魚食之 淮
南子無錢之鈎不可以得魚 雞肋編鈎絲之半繫以
荻梗謂之浮子視其沒則知魚之中鈎韓退之釣魚詩
云羽沉知食馱則唐世蓋浮以羽也 列子詹何以獨

繭絲為綸芒針為鈎荆條為竿剖粒為餌引盈車之魚
闕子魯人好釣者以桂為餌鍛黃金之鈎錯以銀碧
垂翡翠之綸拾遺記漢武嘗以季秋泛靈鵠舟於淋
池以香金為鈎霜絲為綸丹鯉為餌釣得白蛟付太官
為鮓庶物異名疏郭賦筒灑連鋒筒灑皆釣名

筍

魯語水虞于是乎講畧畧取名魚登川禽爾雅嫠婦
之筍謂之罍疏孫炎云罍曲梁其功易故謂之寡婦之

筍然則曲者箔也以箔為魚筍其功易號寡婦之筍耳
非寡婦所作也 演繁露筍者魚筍也 出廣韻 筍者以竹
為器設逆鬚於其口魚可入不可出也

斷

三才圖會斷者斷也織竹如曲薄屈曲圍水中以斷魚
蟹之逸其名曰蟹斷不專取蟹也 傅肱蟹譜今之採
捕者於大江浦間承峻流環緯簾而障之其名曰斷 音鍛
於陂塘小溝港處則皆穴沮洳而居居人盤黑金作鈎

狀置之竿首自探之夜則燃火以照咸附明而至焉
陸龜蒙蟹志稻之登也蟹率執一穗以朝其魁然後任
其所之早夜曹沸指江而奔漁者緯蕭承其流而障之
名曰蟹斷 庶物異名疏吳都記江濱漁者插竹繩編
之以取魚謂之扈業大魚跋扈而出故名強梁曰跋扈
詩云無然畔援鄭箋畔援猶跋扈扈業亦槎頭蟹斷之
類耳

諸漁具

大唐新語漁具總曰笭簍 尸子漁之為事也有釣網

罟笭罟罟罟笭笭罟罟罟之類 初學記罟網

罟也算取蝦也 見廣雅 籊取蟹也 鈎取鼃鼃也 見何承天

纂文云鈎鐵有距施竹頭以之擲鼃鼃 百陽雜俎晉

時錢塘有人作笭年取魚億計號萬匠笭 詞林海錯

陸魯望詩到頭江畔尋漁事織作中流萬尺笭笭取魚

具也 丹鉛總錄石鼓文其魚維何維鯢及鯉何以索

之維楊及柳索包也今之漁者多以木楊或箬葉作包

覆魚入市易曰包有魚是也東坡石鼓歌其魚維魴貫之柳蓋以橐為貫也貫魚包魚別是一義不可混而為一爾雅摻謂之湊註今之作摻者聚積柴木於水中魚得寒入其裏藏隱以薄圍捕取之詞林海錯摻說

文云以柴木壅水也江賦摻澱為湊夾衆羅筌皆取魚之具蜀中有魚摻之名庶物異名疏襄陽耆舊傳曰漢水中鰕魚甚美常禁人捕以槎斷水因謂之槎頭鰕按以槎斷水即陸龜蒙志所謂緯蕭承其流而障之名

曰蟹斷之類是也 山堂肆考池籞池中編竹籬以養
魚者 三才圖會艫艘編細竹為簾其口織篾為蓋有
鬣從口漸約而至鬣使魚能入而不能出筴帚形似箕
水寒魚多伏用此以漁之

諸獵具

事物紀原稿竿粘鳥具弋磻射鳥箭 庶物異名疏槎
桎檻獸之具蘇則從魏文帝行獵槎桎拔失鹿 侯鯖
錄空喉取狗器也

附
匠具

斧

古今事物類考神農作斤斧 釋名斧甫始也凡將制
器始以斧伐木已乃制之也 事物原始斤者斫木斧
也 名物考柯斧柄也周禮云柯長三尺博三寸 物
類相感志妊娠人欲男將斧潛安牀下刃著下必生男
求驗之法但將斧刃向下於雌雞伏卵時試盡出雄雞
也 酉陽雜俎李師古治山亭掘得一物類鐵斧頭時

李章武遊東平師古示之武驚曰此禁物也可飲血三斗驗之而信

鋸

物原軒轅作鋸 古史考孟莊子作鋸 說文倉唐鋸也 正字通鋸解器也鐵葉為齟齬其齒一左一右以片解木石也 莊子天下好智而百姓求竭矣於是乎鋸鋸顓焉 管子軍中必有一斧一鋸

鉋

附鋸

事物紺珠推鉋平木器魯般作 正字通鉋正木器鐵
刃狀如鏟銜木匡中不令轉動木匡有孔旁兩小柄以
手反復推之木片從孔出用捷於鏟 紺珠鉋平木小
鉋

鏟 古史考公輸般作鏟 說文鏟平鐵也

鑽

物原般作鑽 事物紺珠鑽所以穿通者 六書故鏟
穿器之銳者似鑽而小

鑿

事物紺珠鑿音作所以穿木軒轅制 古史考孟莊子
作鑿 甘泉賦般倕棄其剗剗兮注應邵曰剗曲刀也
剗曲鑿也 伊川語錄杓鑿者樺卯也樺卯圓則圓樺
卯方則方

諸匠具

揚雄方言梁益之間裁木為器曰鉞 通俗文規模曰
范以土曰型以金曰鎔以木曰模以竹曰范 甘泉賦

王爾投其鈎繩注鈎曲尺也

筆談審方面勢覆量高

深遠近算家謂之專術專文象形如繩木所用墨斗也

廣韻商君書赭繩束枉木古之匠人用赭繩即今墨

斗是也 爾雅疏椹者斫木所用以藉者之木名也一

名據孫炎云斲木質也詩商頌云方斲是虔 六書故

錯以剛鐵交錯為深理磨厲金石者也 淮南子鼓索

吹埵以銷銅鐵注埵銅索口鐵筩埵入火中吹火也

事物紀原韞囊以吹火即古索籥今曰皮排 事物

原始鉞以鐵二股兩頭交錯用以持冶器以鎔鑄金鐵之類卽鉗也

附諸雜具

齊東野語用鐵數片長五寸許闊二寸五分如拍板樣磨鏡匠手持作聲使閨閣知名曰驚閨事物紺珠驚繡如小鉗而厚手提擊事物原始鑷鉗也以鐵為之用以拔鬚髮者今篋頭者手持之作聲名曰喚頭事物紺珠報君知員銅片手提擊

格致鏡原卷四十八

欽定四庫全書

格致鏡原卷四十九

大學士陳元龍撰

日用器物類一

斗斛

禮月令日夜分則同度量鈞衡石角斗角正權概注甬
斛也概執以平量器者 周禮栗氏為量鬴深尺內方
尺而圓其外其實一鬴其觔一寸其實一豆其耳三寸
其實一升重一鈞其聲中黃鍾緊而不稅 左傳齊舊

四量豆區鬴鍾四升曰豆各自其四以登於鬴注四豆為區斗六升也四區為鬴六斗四升也鬴十則鍾六十斗也左傳疏杜據儀禮今文故以庾為十六斗五千庾凡八千斛考工記陶人為庾實二鬴其下文瓠人云豆實三而成鬴則鬴受斗二升庾實二鬴則受二斗四升也彼陶人所作庾自瓦器今甕之類非量器也與此名同而實異漢律歷志量者龠合升斗斛也所以量多少也本起於黃鍾之龠用度數審其容以秬黍中

者千有二百實其龠以井水準其槩十龠為合十合為升十升為斗十斗為斛而五量嘉矣其法用銅方尺而圍其外旁有疵焉其上為斛其下為斗左耳為升右耳為合龠其狀似爵以縻爵祿 禮記十斗曰斛十六斗曰簋十簋曰秉鄭注秉十六斛今江淮之間量名以為簋者今文簋為逾 稗史類編考工記鬴法積百萬分乘除布算則龠為七百八十一分二釐五毫實黍二千二百合為千五百六十二分五釐實黍二千四百升為萬

五千二百六十七分實忝二萬四千鬴為百萬分實忝
百五十三萬六千大元數曰凡七十有八萬黃鍾之數
立焉正與此合於是見阮胡龠合升斗皆大而鄧保信
林億等皆小 傳疑錄量起於黃鍾之龠十龠為合以
十乘之而為斛後世斛容五斗忝穀出入兩斛當一石
凡糧稅入籍為石者皆兩斛也此或便於轉輸俗因用
之漢書糧穀稱斛鹽亦稱斛茭藁稱石注曰石百二十
斤也斛石權量用同 稗史類編以斛為石不知起何

時自漢以來始見之石本五權之名漢制重百二十斤
為石非量名也以之取民賦祿如二千石之類若酒言
石從其味之醇醜如以石米釀酒醇者止七斗或六斗
而醜者多至於十五六斗未嘗有定數也至於麵言斛
石麵亦未必止為麥百二十斤而麥之實有小大虛實
然沿襲至今莫知為非殊可笑也 唐樂志張文收既

定樂鑄銅斛二 珊瑚鈎詩話劉仲原得銅斛二於左

馮翊其一云始元四年造其一云甘露元年十月造數

量皆同云容十斗後刻云重四十斤以今權量校之容
三斗重十有五斤乃知古今不同 李商隱太倉箴
合斗斛何以用銅取寒暑暴露不改其容 農田餘話
今之官斛規制起於宋相賈似道前元至元間中丞崔
或上言其式口狹底廣出入之間盈虧不甚相遠遂行
於時至今不改 丹鉛總錄歷代斗斛大小不同左傳
疏云魏齊斗秤於古二而為一周隋斗秤於古三而為
一 張端義貴耳集升斗古小而今大昔人飲酒有數

石而不亂者班固論一夫百畝所收之粟人食月一石
五斗古之人亦今之人也豈有一人能飲數石日食五
升者乎 演繁露開元九年勅量以十升為斗斗三升
為大斗 逢原記宣宗有八角玉升西夷且陀國所進
夏以水澆之則無暑冬以火逼之則無寒

尺

律歷志度者分寸尺丈引本起黃鍾之長以子穀秬黍
中者子穀北方黑黍一黍之廣度之九十分為黃鍾之

取大小中者

長一為一分十分為寸十寸為尺十尺為丈十丈為引而五度審矣其法以銅高一寸長一丈而分寸尺丈存焉以為引高一分分者自三微而成著可分別寸忖尺隻職在內官廷尉掌之

隻音約

傳疑錄度起於黃鍾之

長後世十寸謂之尺十尺謂之丈凡公私所度皆以丈計矣禮書家語曰布指知寸布手知尺投壺記曰籌室中五扶堂上七扶公羊傳曰膚寸而合鄭氏曰鋪四指曰扶一指按寸何休曰側手為膚按指為寸扶即膚

耳然則寸尺之度取諸身也漢律歷志曰一黍之廣為分十分為寸十寸為尺然則尺寸之度又取諸物也先王制法近取諸身遠取諸物足以考信而無疑焉然後尺寸之度起矣則指尺之與黍尺一也黍有巨細故尺有長短先儒以黍之巨者積而為寸則于膚指不合於是有所指黍二尺之辨謂圭璧之屬用指尺冠冕尊彝之屬用黍尺豈其然乎周禮典瑞璧羨以起度考工記璧羨度尺好三寸以為度璧徑九寸羨而長之從十寸度

八寸同謂之度尺則周之法十寸八寸皆為尺也 蔡邕獨斷夏以十寸為尺殷以九寸為尺周以八寸為尺周祈名義考周尺纔得今六寸六分家語布指知尺謂以拇指食指一麥仍以食指屈二節為一尺湯九尺丈王十尺亦可推 晉書晉泰始九年荀勗校大樂八音不和始知後漢至魏尺長於古四分有餘勗乃部著作即劉恭依周禮制尺所謂古尺也 晉書世說稱有田父於野地中得周時玉尺便是天下正尺荀勗試以

校已所治金石絲竹皆短校一米又漢奚景於冷道舜祠下得玉律度以為尺相傳謂之漢官尺以校荀尺荀尺短四分漢官始平兩尺長短度同又杜夔所用調律尺比最新尺得一尺四分七釐魏景元四年劉徽注九章云王莽時劉歆斛尺弱於今尺四分五釐即荀最所謂今尺長四分半是也元帝後江東所用尺比荀最尺一尺六分二釐趙劉曜光初四年鑄渾儀八年鑄土圭其尺比荀尺一尺五分荀最新尺惟以調音律至於人

間未甚流布故江左及劉曜儀表竝與魏尺略相依準
裨史類編歷代尺一周尺漢劉歆銅斛尺後漢建武
銅尺荀勗所定晉前尺祖冲之銅尺竝同二晉田父玉
尺梁法尺實比周尺一尺七釐三梁表尺實比周尺一
尺二分二釐一毫有奇隋時始用木尺而定律呂大業
中更詔用梁表律調八音之器四漢官尺晉時始平掘
得古銅尺實比周尺一尺三分七釐晉荀勗既定晉前
尺阮咸說其聲高則悲非興國之音必古今尺有長短

所致也後始平掘地得古銅尺不知所出何代果長勗
尺四分時人咸服其妙而莫能措意焉五魏尺實比周
尺一尺四分七釐杜夔所用者六晉後尺實比周尺一
尺二寸一分二釐晉氏江東所用者七後魏前尺實比
周尺一尺二寸七釐八中尺實比周尺一尺二寸一分
一釐九後尺實比周尺一尺一寸八分一釐即隋開皇
官尺謂鐵尺及後周市尺十東後魏尺實比周尺一尺
三分八毫十一蔡邕銅籥尺後周玉尺同實比周尺一

尺一寸五分八釐十二宋氏尺錢樂之渾天儀尺後周
鐵尺同實比周尺一尺六分四釐後周時達奚震等議
今勘周漢古錢大小有合宋氏渾儀尺度無舛古者黃
金方寸重一斤今鑄金校驗鐵尺為近司馬備刻宋尺
後周尺又云太常寺樂律尺少府監祭器景圭渾儀尺
皆同實比周尺一尺五分十三隋萬寶常永尺實比周
尺一尺一寸八分六釐十四雜尺實比周尺一尺五分
趙劉曜渾天儀土圭所用者十五梁朝俗簡尺實比周

尺一尺二分有奇十六宋朝和岷景表尺比周尺一尺
六分有奇十七阮逸胡瑗皇祐樂書黍尺比周尺一尺
七分 演繁露開元九年勅度以十寸為尺尺二寸為
大尺 演繁露唐時一尺比六朝制一尺二寸王制曰
古者周尺八尺為步今以周尺六尺四寸為步 稗史
類編宋韓忠獻公丁文簡公校阮胡尺令尺匠石素等
再累黍制尺二條其一比周尺一尺三分五釐宋司馬
備刻三司布帛尺比周尺一尺三寸五分宋禮部頒祭

祀儀式造禮器尺比周尺一尺三寸二分 演繁露官
尺者與浙尺同僅比淮尺十八而京尺者又多淮尺十
二公私隨事致用元無定則予嘗怪之蓋見唐制而知
其來久矣金部定度以北方秬黍中者為則凡橫度及
百黍即為一尺此自其一代之法不須較古今同異也
然此尺既定而尺加二寸別名大尺又因著為之令曰
鍾律冠冕之類則用秬尺內外官司悉用大尺則國立
之制明為二體其與古人同度量之義乖矣唐帛每四

丈為一匹用大尺準之蓋秬尺四十八尺也秬尺長短
不知合今何尺然今官帛亦以四丈為匹而官帛乃今
官尺四十八尺準以淮尺正其四丈也國朝事多本唐
豈今之省尺即用唐秬尺為定耶不然何為官府通用
省尺而繒帛特用淮尺也 六典注中尚署令每年二
月二日進鏤牙尺及木畫紫檀尺 天中記二月二日
賜紅牙銀寸尺各一白居易狀當晝夜平分之時頒度
量合同之令 五侯鯖金粟尺富家以金粟飾之 戒

蒼漫筆蘇州馬懷德樟星板一副十二片烏木為之自
小漸大大者長七寸餘標為一指二指以至十二指俱
有細刻若分寸然又有象牙一塊長二寸四角皆缺上
有半指半角一角三角等字顛倒相向蓋周髀算尺也

秤

漢律歷志權者銖兩斤鈞石也所以稱物平施知輕重
也本起於黃鍾之重一龠容千二百黍重十二銖二十
四銖為兩十六兩為斤三十斤為鈞四鈞為石 傳疑

錄衡起於黃鍾之平權與物鈞而為衡衡平而權鈞矣
衡以準曲直也五則之法衡規矩繩準衡運生規圓
生矩矩方生繩繩直生準 稗史類編皇祐新樂圖有
銖秤其圖幹十分二十四銖為一兩正一面有星一繫
一盤如民間金銀等子者其鍾形如環

算盤

劉馮事始黃帝使隸首作算數得下籌之法周公作九
章詳明算法而制算盤之始 清異錄宣武劉錢民也

鑄鐵為算子 晉書王戎自執牙籌計算徹夜常若不
足

繩 附索

小爾雅緇索也大者謂之索小者謂之繩詘而戾之為
紆 稗史類編易曰上古結繩而治書序曰伏羲造書
契以代結繩之政則是繩出於太昊之前高氏小史曰
燧人氏時結繩刻木以記事則繩自燧人始也 白虎
通或曰封者金泥銀繩或曰石泥金繩 韻府韋固旅

次宋城遇一老向月檢書固問囊中赤繩何用答曰以
繫夫婦之足雖仇家異域此繩繫之不可易也 蕭方
等三十國春秋慕容垂攻鄴符丕遣其從弟就請救乃
遺謝玄青銅鏡黃金宛轉繩等以之為信 伽藍記河
間王琛置玉井金罐以金五色績為繩 酉陽雜俎北
朝婦人五月五日進長命縷宛轉繩皆結為人像帶之
北史合朔儀經日有變以朱絲為繩以繞係社樹三
匝說梏繇音護絲繩也見金陵學宮所刻山谷辨剛卯

說 夷堅志江陵士人稱挽畜產繩緯之名曰五尺

庶物異名疏周禮供具綯

音振

綯牛鼻繩也

索 物原軒轅作綿索 荆楚歲時記正月一日懸葦

索於戶鬼惡之 李肇翰林志端午賜百索為壽索

葉隆遠志五月五日以雜絲結合歡索纏於臂膊 漢

溝洫志寡長艾兮湛美玉注臣瓚曰竹葦絙謂之艾也

所以引置土石也師古曰絙索也艾字宜從竹音交又

音交 事物紺珠綯又名縞井索古書云統 荀子短

綆不可以汲深泉 事物紺珠經貫錢具緡貫錢細索
莊子緡謳所生必於斥苦司馬彪注緡引柅索也斥
疎緩也苦用力也引緡所以有謳歌者為入有用力不
齊故促急之也 唐書契丹將李楷固善用絹索飛索
絹唐將張元遇麻仁節生獲之

鎖鑰

禮月令孟冬修鍵閉慎管籥注謂鎖之入內者 小爾
雅鍵謂之鑰 芝田錄門鑰必以魚取其不瞑目守夜

之義 南史戴發興臨死封閉庫藏使家人謹錄鑰壯
北史禁門鑰曰鵲鑰 唐書朱滔反納金鑰於回紇
曰願聽命於可汗謹上金鑰啓閉出納惟所命 硯北
雜志故宋宮中用魚鑰降魚取匙降匙取魚古制也

賢奕編鑰鑰云者以其形如籥耳今鑰有圓身者古制
也方身鑰近世所為唐人云銀鑰卻收金鑰合誤以開
鑰具為鑰開鎖具自名鑰匙亦名鎖匙 異苑晉康帝
建元中有漁父垂釣得一金鎖引鎖盡見金牛急挽出

牛斷猶得鎖長二尺 酉陽雜俎齊郡接歷山上有古
鐵鎖大如人臂繞其峯再浹相傳本海中山山神好移
故海神鎖之挽鎖斷飛來此矣 酉陽雜俎安祿山思
寵莫比其所賜品目有銀鑿鏤鐵鎖 孔六帖屬賓國
武德二年遣使貢金鎖 錄異記姜蕤鎖金鏤相連屈
伸在人 後漢書崔烈以銀鐺鎖注銀鐺大鎖也

梯

事物紺珠梯木階軒轅制 史記注通天臺上有天梯

正字通鹽鐵論言漢代百戲有唐梯追人奇蟲胡妲
唐梯謂人倒擲以梯置足掌上一人上梯從梯蹬中轉
身蜿蜒猶今戲家之翻空梯也清異錄江南後主同
氣宜春王從謙常春日與妃侍游宮中後園妃侍觀桃
花爛開意欲折而條高小黃門取綵梯獻時從謙正乘
駿馬擊球乃引鞚至花底痛採芳菲顧謂嬪妾曰吾之
綠耳梯如何

析

物原軒轅作柝 鄭司農注柝戒守者所擊也 稗史
類編易繫辭曰重門擊柝以待暴客蓋取諸豫說文櫟
夜行今擊木為聲以代更籌者是俗曰蝦蟇更櫟即柝
詞林海錯猷音伐打更木也西京賦植鍛懸猷用戒
不虞 藻林金柝軍中警夜刁斗也文選金柝警夜

鈴

廣韻鈴似鐘而小 左傳注鈴在旗上動則有聲 拾
遺記魏文帝迎薛夜來車前有雜寶為龍鳳銜百子鈴

晉書清河王覃初為清河王世子所佩金鈴欵光隱
起狀如麻粟祖母陳太妃以為不祥欲毀而賣之占者
以為金是晉行大興之祥覃為王裔是其瑞也 齊書
莊嚴寺有玉九子鈴後主剝取以施潘妃殿飾 開元
遺事寧王每花時綴金鈴於花下掣之以驚禽謂之護
花金鈴 集異志元和中翰林院有鈴夜中文書入則
引之以代傳呼長慶中河北用兵鈴輒自鳴與軍中息
耗相應聲急則軍事急聲緩則軍事緩 集仙傳太上

大道君遣協晨大夫妻門賜大茅君盈金虎真符流金之鈴

剪刀

事物原始剪古史考曰鐵器也用以裁布帛始於黃帝時逸雅剪刀剪進也所剪稍進前也清異錄上饒

葛溪鐵精而工細余中表以剪刀二柄遺贈皆交股屈環夷門廣牘嘗有鑲鐵剪刀一把製作極巧外起花鍍金裏面嵌銀回回字者廣韻藻潘炕姬有雙龍奪

珠之剪 搔首集姑園鐵作剪刀以首指根粉養之裁衣則畫成墨界不用人手而自行

針

稗史類編禮記內則有紉針請縫之事由此考之當是自始制衣裳則宜有針線矣帝王世紀曰太昊制九針由此始也 管子一女必有一鍼一鉢注鉢長鍼也同鍼 荀子有物於此善治衣裳不盜不竊穿窬而行日夜合離以成文章已能合從又善連橫是之謂鍼 莊

子挫鍼治解足以餉口注挫鍼縫衣也 白虎通婦人

佩針縷 西京雜記漢宮女七夕穿針皆會於開襟樓

針皆七孔 荆楚歲時記七夕婦人以綵絲穿七孔針

或以金銀鑰石為針 拾遺記魏文帝所愛美人姓薛

名夜來妙於鍼工深帷之內不用燈燭裁製立成宮中

號為鍼神又孫權趙夫人能刺繡於方帛上寫五岳河

海城邑行陣之形時人謂之針絕 北史魏胡太后幸

西林園法流堂命侍臣射太后自射針孔中之 演繁

露張籍吳楚歌詞云庭前春鳥啄林聲紅夾羅襦縫未
成今朝社日傳針線起向朱櫻樹下行則知社日婦人
不用針線自唐已然矣唐百官志中尚署七月七日
進七孔金鈿針提要錄梁汴京七夕乞巧有雙眼針
范至能詩注吳俗元夕婢子以針卜伺其尾相屬為
兆名針姑清異錄針之為物至微者也問諸女流醫
工則詳言利病如吾儒之用筆也朱湯匠氏諳熟粗好
四方所推金頭黃鋼小品醫工用以砭刺者大三分以

製衣小三分以作繡 吳志虞翻曰磁石不受曲鍼

梁書侍郎金元起欲工素問以砭石問王僧孺答曰古
人當以石為針必不用鐵說文有此砭字許慎云以石
刺病也東山經高氏之山多針石郭璞云可以為砭針
春秋美疢不如惡石服虔云石砭石也季世無復佳石
故以鐵代也 稗史類編陰陽家以磁石引針定向每
有戊午丙午之異按本草演義磁石磨針則能指南然
常偏東不全南也其法新鑛中獨縷以半分子蠟綴於

針腰無風處垂之則針常指南以針橫貫燈草心浮水上亦指南然常偏丙位蓋丙為火庚辛金受其制故如是物類相感耳

線

周禮縫人掌王宮縫線之事 考工記鞞人察其線欲其藏也注謂縫革之縷也 西京雜記漢高時宮中七月七日以五色縷相羈謂為相連愛 荆楚歲時記晉魏宮中以紅線量日景冬至後日影添長一線 唐雜

錄宮中以女工撥日長短冬至後日晷漸長較常日添一線之工

熨斗

稗史類編帝王世紀曰紂欲作重刑乃先作大熨斗以火熱之使人舉手輒爛與妲己為戲笑今人以伸帛者其遺意也 丹鉛總錄說文熨持火申繒也一曰火斗 柳文所謂鈇鉚也古音鬱今轉音運 范成大驂鸞錄 鈇鉚熨斗也 東宮舊事皇太子納妃有金塗熨斗

本傳晉韓伯數歲大寒母方為作襦令伯提熨斗而謂之曰且著襦尋當作複禪伯曰不須母問故曰火在斗中而柄熱今既著襦下亦當煖 廣韻藻姚月華以黃金為熨斗名曰麟首

風爐

陸羽茶經風爐以銅鐵鑄之如古鼎形厚三分緣闊九分令六分虛中致其朽漫凡三足其三足之間設三窻底一窻以為通颺漏燼之所置埽堞於其內設三格其

飾以連葩垂蔓曲水方丈之類其爐或鍛鐵為之或運泥為之其灰承作三足鐵杵檯之 李濟翁資暇錄風爐子以周繞通風也一說形像名烙爐子理亦近焉錦繡萬花谷崇慶府永康縣西四十里世傳昔有女子於此上昇有真仙洞聖水池有燒藥爐

附 事物原始筴者截竹為筒用長鐵以通竹節火之未燃吹之 事物紺珠火櫃周公制橋者柄同添火條又名火杖 物原史佚作火杖

火爐

物原唐堯作火爐 事物原始周禮宮人凡寢中共爐
炭則爐乃三代之制也 南史宋庾仲文就劉道錫索
嫁女具得嫁女銅鑪四人舉乃勝 南史梁有司奏吳
令唐傭鑄盤龍火鑪 採蘭雜志馮小憐有手爐曰辟
邪足鑪曰鳧藻皆以飾得名 屠隆香箋薰爐書齋中
薰衣炙手對客常談之具如倭人所製漏空罩蓋漆鼓
可稱清賞今新製有罩蓋方圓爐亦佳

附諸古器

魏武內嚴器誠令孤不好鮮飾嚴具用新皮葦筥以黃葦緣中遇亂世無葦筥乃更作竹方嚴具以阜葦衣之麤布裹之此孤平常之用者也內中婦曾置嚴具於時為之椎壞今方竹嚴具綠漆甚華好汝南先賢傳戴良嫁女以竹方筥為嚴器魏武上雜物疏油漆畫嚴器一純金叅帶畫方嚴器一陸雲與兄機書按行視曹公器物嚴器方六七寸高四寸秦嘉婦與嘉書今

奉嚴器中物幾具 齊書宜都王鑑鎮姑熟於時人發

桓溫女冢得織金篋為嚴器條以啓聞 修復山陵故

事梓宮用嚴器五具馬齒嚴器五具 後宦官傳漢靈

帝作翻車渴烏施於玉門外西橋用灑南郊路以省百

姓灑道之費 渴烏為曲筒以氣引水上也 漢書趙廣漢傳教吏為

鋸甬注蘇林曰鋸音項如餅可受投書孟康曰甬竹甬

也如今官受密事甬也師古曰鋸若今盛錢藏瓶為小

孔可入而不可出或鋸或甬皆為此制而用受書令投

於其中也 鄒長倩與公孫宏書撲滿者以土為器以蓄錢有入竅而無出竅滿則撲之 炙穀子滑稽轉注之器也今若以一器物底下穿孔注之不已 論衡陶者用土為簋簠器形已成不可小大注簋簠成土器之具也 史系天監五年丹陽山南得瓦物高五尺圍四尺上銳下平蓋如合焉中得劍一瓷具數十時人莫識沈約云此東夷罍孟也葬則用之代棺

格致鏡原卷四十九